

靜

志

居

詩

話

靜志居詩話卷七

秀水朱竹垞先生著

扶荔山房編

錢復亨松江華亭人蕭山儒學教諭有講餘集

西湖船製不一以色名者有明玉鎗金金勝寶勝大綠
間緣游紅申屠仲權詩紅船撐入柳陰去釋道原詩水
口紅船是妾家是也以形名者有龍頭白樂天詩小航
船亦畫龍頭是也有鹿頭楊廉夫詩鹿頭湖船唱赧郎
是也形色雜者有百花十樣錦錢復亨題畫詩誰家樓
外停歌舞又上西湖十錦船是也以姓名者有黃船董

船劉船見吳自牧夢梁錄蓋大者謂之頭船最大者賈
秋壑所造車船也車船棚上無人撐駕但用車輪脚踏
而行其速如飛小者謂之瓜皮船廉夫詩小小渡船如
缺瓜歐陽彥珍詩瓜皮船子送琵琶張大本詩瓜皮小
船歌竹枝周正道詩瓜皮船小水中央是也又有總宜
船取東坡居士淡妝濃抹總相宜之句名焉李宗表詩
總宜船中載酒波凌彥珍詩幾度湧金門外望居民猶
說總宜船是也四水潛夫述武林舊事值探春競渡日
畫橈櫓比如魚鱗無行舟之路楊謹思詩大船搥鼓銀

酒缸小船吹笛紅繡窓今則敗舫數艘無復徵歌按舞者矣

蔡庸字惟中紹興山陰人

惟中與錕孟熙唐愚士毛鼎臣齊名時號唐錕毛蔡徐氏席上聞歌一絕云休遣雙鬟唱竹枝聽來渾不是當時自從夢隔巫山雨贏得秋風宋玉悲宛然劉夢得杜牧之遺音

李進字孟昭嘉興人永樂初聘爲府學訓導有西

園先生集

蘇州府志卷之七
孟昭鐵松居士懷用和士林詩選取以壓卷句如杏花
村裏青旗酒楊柳隄邊畫鷁船三月東風初去鴈一番
新雨又飛花菰蒲風外呼漁艇楊柳陰中認酒樓均有
晚唐人風致

張璨字蘊之岷縣人

蘊之取材選體古意猶存婕妤好春怨云太液柳垂絲昭
陽花滿枝如何長信草獨是得春遲

李孟璿名均海鹽人以薦官府學訓導有南莊集
海鹽半邏劉長卿詩所云半邏鶯滿樹也近市有呂家

土人相傳是吳孱陵侯蒙所葬攷之吳志荊州記蒙卒於公安葬於蒲圻則非蒙冢明矣按漢季黃巾之亂吳有許昇妻呂榮不辱於賊爲所殺廩府君歛錢葬之嘉興南地名義婦堰然則冢爲榮之冢也南莊西溪兄弟實居於是予少日欲編輯樵李先民詩李布衣麟友爲二李族孫錄其宗譜所載南莊西溪詩各數十又有李景孟詩一卷今已亡之僅就英華集中兄弟各錄一首景孟中景泰甲戌進士求其詩不復可得附識於此

胡紀字大年舒城人永樂甲午舉人歷官山東布

政司左參議

大年以孝行聞父母之喪俱廬墓次猛虎引避羣鹿來馴有司旌表其門平生以詩畫書得名稱淮西三絕

俞膺富陽人

富陽春江隄在城南菟浦至觀山三百餘丈皆壘以石縣令李濬所築歲久圯宣德十年知縣事吳堂允升重築之民感其惠更名吳公隄云膺有吳公隄歌

廖俊字文英號竹崖蒲圻人中景泰元年鄉試授

漢州學正調嘉定州有芙蓉百詠

竹崖爲漢州學正一日過開元寺聞諸僧誦經音韻朗然歎曰不愈於學生乎乃擇其年幼者四人趙杲方璧周冕張敖置之先賢堂中朝夕誨之後杲舉進士璧冕俱領鄉薦而敖亦由貢生爲府通判再調嘉定手植海棠于學賦詩云曾於雨裏覓蒼苔幽洞移來手自栽枝餘已成人欲去好花他日爲誰開每賓興以花盛開爲驗云

潘亨字從禮淮安山陽人景泰丙子舉人同知武昌府事有冰壑先生遺藁

水壑詩格高聳比於十才子似覺軼倫蟋蟀云愁對燈
前影時聞牀下聲要知因物付何用不平鳴斷續許多
意淒涼無限情誰家急砧杵海內已休兵

張振字孟起嘉興人

附錄周青士云孟起貧居之作曲盡窶人情狀其詩
云青眼交游覺漸稀側身天地可相依若知白石真
堪煮何待黃精爲療饑已過禁烟無熟食不因沽酒
典春衣蒼苔碧草侵階長高臥空齋晝掩扉誦之若
有鬼挪揄於劉伯龍之側也

沈恒字恒吉長洲人

附錄愚山云沈氏二先生貞字貞吉號南齋恒字恒吉號同齋皆以字行善繪事工詩兄弟自相唱酬下至僮僕皆諳文墨同齋則石田先生之父也

秦旭字景暘無錫人有修敬先生集

景暘五峰之父五峰於天順間通籍景暘詩名著於鄉鄙久矣成化壬寅結碧山吟社於惠山之麓與者十人陸勉懋成高直惟清陳履天澤黃祿公福楊理叔理李庶舜明陳公懋行之施廉彥清潘緒繼芳其一則景暘

也時舜明年八十六景暘八十五天澤八十三懋成八十二惟清七十九公祿七十三叔理七十二行之六十九彥清六十一惟繼芳年未五十諸公強之入社其後享年八十餘是時常熟馬紹榮宗勉榜其門長洲李應禎貞伯扁其堂盱江左贊時翊名其亭同邑邵寶因寶爲之記長洲沈周啓南爲之圖江左傳爲佳話吟社九人皆處士獨景暘以子貴封武昌知府行之好著書故景暘詩云先生豈特天趣高著書厭嚼前人糟後於宏治元年上所著書大要謂尙書周易大學中庸注失經

遠臣有一得頗能析理通政使以奏內自稱庶人且穿鑿害道乞正其罪泰陵命焚其書押遣還鄉事載實錄而談修惠山古今考遺之

蕭鎡字孟勤泰和人宣德丁未進士累官太子少師戶部尚書兼翰林院學士有尚約集

蕭鵬舉學詩於劉槎翁當日宋景濂烏繼善劉仲修交稱之宮師鵬舉之子家法不墜

徐有貞初名理字元玉吳縣人宣德癸丑進士選庶吉士授編修歷春坊諭德擢僉都御史天順

初用奪門功拜華蓋殿大學士兵部尙書封武功伯未幾下獄戍金齒尋赦還卒有武功集

武功羽林之作源出右丞其詩云珠袍年少子名冠羽林中獨佩流星劍雙懸日月弓陪游向何處還入華清宮次章云羽箭插腰間駢弓臂上彎自從來日馭長得侍天顏借問歸何晚長楊射獵還

李賢字原德鄧州人宣德癸丑進士授吏部主事歷郎中擢兵部右侍郎改戶部旋改吏部進尙書入直文淵閣終少保兼太子太保華蓋殿大

學士卒贈太師諡文達有古穰正續集

丙閣紅芍藥一本宣宗移自南大內植焉代宗增植二本左純白右深紅七年未花裕陵復辟徐武功有貞許襄敏彬薛文清瑄李文達賢同時入爲學士中一本恰開四花其一久而不落旣而三人皆去惟文達獨留明年春萌芽左二右三中一本甚多而彭文憲時呂文懿原林襄敏文劉文安定之倪文僖謙錢文通溥李侍郎紹黃講學諫同升學士凡八人文達因約花時共賞夏四月開八花是日講學不至明日復開一花僉謂講學

當之文達乃主賞花會賦詩者四十人裒成一集蓋自宣德八年本院有文淵閣賞雪詩未有若是會之盛者至正德中大學士梁儲楊一清猶有詩倡和嘉靖初長洲陸粲爲庶吉士賦詩云此花初種自宣皇百曲雕闌七寶妝玉堂學士看花早賦成芸閣留詩草度其時遺種尙存其後不可問矣

王誼字內敬紹興山陰人宣德初待詔翰林預修國史以子佑貴封工部右侍郎

內敬兄弟皆能遠師太白一時之希聲也內敬關山別

意云蓮葉未青時沙頭話別離舟行期早發日晏未曾
移遲迴一何久念我平生友莫問去程遙且盡杯中酒
君今住何處萬里長城路路遠人迹稀黃雲黯朝暮隴
阪歷欹傾雙輪不暫停時聞嗚咽水流作斷腸聲驅車
無少息又度長蘆北八月雁南飛天山草俱白橫笛在
高樓闕山月裏愁離人聽此曲白盡少年頭魏楚白謂
其學供奉長于詞得其形似誼弟懌字內悅正統初官
溧水知縣有江南意云郎居橫江口妾住橫江上生小
慣風波蓮舟喜搖蕩蕩舟蓮花灣花紅照人顏舉頭見

郎來低頭隱花間花疎不成隱相見還相哂都緣愁思
深留連夕陽盡前浦伴將稀那能不相違含情明月下
各自權歌歸

呂原字逢原秀水人正統壬戌賜進士第二除翰
林編修歷右春坊大學士轉通政司右參議仍
入爲翰林院學士以母喪歸卒贈禮部右侍郎
諡文懿有介菴集

文懿不以詩名所爲古風引伸曲喻不求工而自然精
切此有德者之言也

姚夔字大章桐廬人正統壬戌進士累官禮部尚書調吏部加太子少保卒贈少保諡文敏有墓

臺堆橐

文敏久領容臺修明禮樂其於先賢祀典聞必舉行因錢長沙澍之請而建祠賈誼之井因章布政繪之疏而樹碑比干之祠因商學士輅之章追封董仲舒等伯爵因左吏部贊之奏而修護李泰伯之塋他若爲金華四先生及劉因立祠皆有裨名教自公沒而程敏政建議於前張孚敬順之於後舉凡戴聖劉向鄭衆賈逵何休

馬融服虔鄭元盧植王肅王弼杜預范甯等一十三人
從祀孔子之廡者皆罷之真天資刻薄人所爲也文敏
過忠州弔陸宣公墓賦詩云一讀遺文數行淚拜瞻松
柏不勝悲因而訪李吉甫白居易胡旦諸公皆謫此地
問有祠否土人爲言故有今廢乃檢行囊廩米一石倡
之屬州守廣文修舉作詩以勉其成焉可以媿程張諸
老也已

項忠字蓋臣嘉興人正統壬戌進士授刑部主事
歷員外郎中陞廣東按察副使改山東遷陝西

按察使陞右副都御史進左都御史刑部尚書

改兵部卒贈太子太保謚襄毅有藏史居集

襄毅以功業顯詩文罕傳其里居日結樵李耆英之會
月一集於僧房道院中同會者雲南布政司參議金禮
敬之四川按察司僉事梅江文淵福建按察司僉事戴
祐元吉漳州知府姜諒用真武岡知州伍方公矩礪山
知縣包盈汝和通判湯彥和教授陳蒙福主之者公也
會始於宏治戊午春所賦詩文文淵彙爲一集府學教
授新淦蕭子鵬序之比於香山洛社云

葉盛字與中崑山人正統乙丑進士授兵科給事中出爲山西右參政累官吏部左侍郎卒諡文莊有涇東橐

文莊中外敷歷不遑寧居而見一異書雖殘編蠹簡必依格繕寫備藏之目爲卷止二萬餘然奇祕者多亞於冊府二百年來子姓蕃衍瓜分豆剖難以復聚今披棗竹堂書目譬諸商榘泗鼎要非近代物惜不可得而觀矣詩特餘事選家恒置不錄近其裔孫始重鐫刻行之然有德必有言後之學者所當諷誦也

劉昌字欽謨吳縣人正統乙丑進士授南京工部
主事歷員外轉工部郎中出爲河南提學副使
遷廣東參政有胥臺鳳臺金臺嵩臺越臺諸橐
欽謨無題五首不脫元人舊染而世顧稱之昔晉人之
譏劉輿也謂輿猶賦近則汗人若欽謨及瞿宗吉楊君
謙張君王之艷詩其不汗人也僅矣

陳獻章字公甫新會人正統丁卯舉人周薦授翰
林檢討卒諡文恭從祀孔廟有白沙集

成化間白沙詩與定山齊稱號陳莊體然白沙雖宗擊

壤源出柴桑其言曰論詩當論性情論性情先論風韻無風韻則無詩矣故所作猶未墮惡道非定山比也其云百鍊不如莊定山蓋謙辭爾

岳正字季方灤縣人正統戊辰賜進士第三天順初以左贊善兼修撰直文淵閣降欽州同知謫戍肅州成化初復官未幾出爲興化知府卒謚文肅有類博稟

季方謂作詩既要平仄又要對偶安得許多工夫頗以吟詠爲苦而天眷之作亦復成章

案文肅有營建紀成詩自注天眷美營建也

劉翊字叔溫壽光人正統戊辰進士累官太子太保戶部尚書兼謹身殿大學士卒贈太保諡文和有古直先生集

文和詩率意塗寫不事翦裁亦間有合格處其送龍溪潘榮宗用詩云同年喜有九尚書九尚書者睂州萬文康安循吉歷城尹恭簡旻同仁博野劉文穆吉祐之華亭張莊懿鑿尚文三原王端毅恕宗貫莆田陳康懿俊士英其二則潘與劉皆正統十三年同榜也宗用仕爲

南戶部尚書八人皆有易名之典惟潘闕焉

鄭文康字時又崑山人正統戊辰進士不仕有平

橋集

平橋集文勝於詩嘗從徐立齋閣老借含經堂所藏本
讀之愛其簡質有類石守道尹師魯諸公詩亦蘊藉

倪敬字汝敬無錫人正統戊辰進士官監察御史

有月樓集

宋毛珣吾竹題蘇子美滄浪亭詩云日暮客歸園館閉
鷺鷥飛上石碁盤侍御題畫作云溪雲靄靄樹團團溪

上幽亭六月寒日暮看山人已去水禽飛上石闌干頗
與相類然知非蹈襲不妨並垂也

夏寅字正夫松江華亭人正統戊辰進士除南京
吏部主事歷郎中陞江西提學副使參政浙江
遷山東右布政使有史詠紀行集

正夫名亞欽謨方劉似勝

附錄王元美云夏正夫如鄉里老人衣錦見達官非
不嚴麗但寒鄙可厭

周鼎字伯器嘉善人正統中官沭陽典史有桐村

疑舫齋土苴集

桐村開濟之畧戎幕宣勞顧一尉白頭又遭蕙苒之謗
哀哉斯人實命不淑同時杜州牧庠貽詩云功名已覺
邯鄲夢衰老猶耕谷口田汪縣令貴詩云白首九旬還
向學黃梁一夢總成虛呂太常憲詩云斯文籍籍歸輿
論何物區區戀抱關沈處士周詩云山縣軍書前吏迹
墓堂文字老生涯吳江史處士鑑詩云行誼故絕人文
章復名世碑版照南州煌煌自無替集中詩題有未死
作云在塗嗟未歸行囊日已貧正如風中絮未肯沒車

塵嘲鴈云何地不虞網此身非故鄉誦之使人心慟詩
不見佳第恥拾人遺唾亦有志之士明古實師事之

附錄愚山云伯器博極經史爲弟子師例當以掾曹
得官謝病不就正統中大征閩寇沐陽伯金忠參贊
軍務辟置幕下與千戶龔遂奇從數騎入尤溪山砦
降其衆而還幕府不知也寇平遇土木之難祿其賞
久之授沭陽典史坐累下獄事白致仕遨遊三吳賣
文爲活吳中墓志譜牒皆出其手

郭登字元登武定侯英諸孫景泰初官都督僉事

守大同以功封定襄伯英廟復辟謫戍甘肅成
化初復爵卒贈侯諡忠武有聯珠集

定襄力捍牧圉功存社稷聯珠一集繼父兄掉鞅詩壇
西涯以爲明初武臣之冠卽其山王楸樹諸篇力已排
昇至詠梟之作直兼張王韓杜之長豈惟武臣一時臺
閣諸公孰出其右錫山俞汝成乃謂可式後之爲勲衛
者是替者之言也

楊翁字仲舉吳縣人少與兄戍武昌爲鄉校師仁
宗驛召授翰林編修歷修撰遷廊府長史景泰

初擢禮部左侍郎尋進尚書有晞顏先生集

晞顏集借之琴川毛氏蒙叟爲施鉛評云宜亟焚毀勿
暴其短於後世可也未免太過楊公長者當存其言以
予所錄二首亦自成章

柯潛字孟時莆田人景泰辛未賜進士第一授翰

林修撰歷右春坊右中允洗馬遷尚寶少卿陞

詹事府少詹事兼翰林學士有竹巖集

漢有金馬石渠蘭臺東觀宋有總明陳有德教周則虎
門麟趾北齊則仁壽文林唐則麗正集仙開元中始定

爲翰林院其署與他公廨不同中有徘徊精舍四面步
廊畫壁花磚假山叢竹侈金鑿之密記建學士之新樓
汴宋玉堂尤加藻飾泊乎南渡雖屬偏安而省舍一新
濯纓之泉滌硯之澗芸香之亭汗青之軒以及蓬巒松
坡蘭畦芝館藥洞菊徑橘洲鶴砌儲圖史翰墨於中故
論者以詞臣爲神仙之職也明初舊院有修竹林學士
黃宗豫寄東里詩云一別詞垣數月餘娟娟修竹近何
如北京旣建院設玉河橋西堂後有井劉文安所鑿也
亭二間凡八楹柯學士所築也井在左亭居右至今入

翰苑者以劉井柯亭爲佳話而堂後柏二株亦學士所
植李長沙選館受業於柯後李教習庶常以學士柏爲
題汪吉士俊有一日百回行樹底之句李悵然有感衍
爲長歌云我行樹陰日千匝雨葉風枝自蕭颯惟有諸
生識我情旁人不解空嘲狎我見先生種樹年我身尙
短樹及肩枝蟠江山地可縮手幹造化天無權瓊臺翠
閣何森爽院柳庭花敢爭長芑蔭長畱六月陰盤迴直
與孤雲上材堪五鳳難爲用根列九泉終不枉零落青
袍幾故人瑋琮玉佩空遺響當時院長文安公柯亭劉

井相西東百年遺愛豈獨此此樹欲比人中龍柏猶如
此我何似已媿斑白非兒童名收榱桷有先後壽比金
石無終窮下堂再拜想顏色仰面正拂長髯風於是倡
和成卷以貽學士之子使藏焉蓋學士汲引後進孜孜
如不及二百年來樹猶勿翦勿拜至今想其文采風流
僕嘗思文獻可徵而詞林掌故闕焉不講在中禁日會
粹玉堂舊事自唐宋迄明撰瀛洲道古錄一編弟子長
洲陸肯堂請事開雕謂刊成凡入院者必給一本庶知
以古人自期斯文不幸陸生云亡至今藏之篋衍恐終

歸覆醬可歎惜也

楊守陳字維新鄞縣人景泰辛未進士改庶吉士
除翰林編修歷侍講洗馬遷學士擢吏部右侍
郎兼詹事府丞卒贈禮部尙書諡文毅有晉菴
桂坊鏡川東觀金坡銓部諸集

文毅難經伉伉不屑拾淳熙諸儒遺唾而詩格深穩在
唐宋之間其史館感懷詩云在古左右史言動悉分書
由漢至國初有官注起居不知自何歲史職曠成虛有
故始闢館編纂亦紛如新人敘陳迹寧免闕且疎又云

崔杼弑其主直筆遭刑誅二弟相繼死南史猶特書古
人守一職往往思捐軀可憐今世士利害論錙銖蓋公
畱心史學嘗草疏言國史有三大闕事未舉一靖難後
不記建文君朝政及方黃死事諸臣一景帝已復位號
實錄猶附書稱廓冥王一章疏畱中者不獲登實錄宜
宣付史館惜乎疏雖草而未及上也晚語徐少詹云平
昔才無半斗而勤作文飲僅數合而喜與客讌行不能
里許而好游葢雅人之習尙然矣

童軒字士昂鄱陽人以天官學入欽天監家於南

京中景泰辛未進士以吏科給事中撫川寇謫
知壽昌縣久之以太常少卿掌欽天監以右副
都御史總制松潘歷陞吏部尚書致仕有清風
亭橐枕肱集

附錄周吉甫云尚書九日詩云黃菊酒香人病後白
蘋風冷鴈來初草堂詩云草堂夜雨生科斗花逕春
風叫栗畱均佳句也

王越字世昌濬縣人景泰辛未進士天順中以御
史超拜右副都御史巡撫大同進太子太保兵

部尙書論出塞功封威寧伯佩征西前將軍印
尋加少保兼太子太傅卒贈太傅諡襄敏有雲

山老嬾集

威寧功紀旂常盟申帶礪立功已足不朽而於詩沾沾
自喜長篇奔放如快馬不受羈絆未免有銜蹶之虞雖
意在取法盛唐然往往流入擊壤一派其送周宗太詩
云可憐相見未能久無那匆匆又分手臨岐把袂且談
詩何用尋常一杯酒古詩起於列國前孔子刪爲三百
篇發乎情性止禮義所以音律皆自然後來風雅不復

作獨有離騷味堪嚼秦漢已下雖頗淳已食古人之糟粕盛唐取諸杜少陵西晉取諸陶淵明少陵忠義所感激淵明渾然而天成一代之詩無足齒宋人之詩理而已抑揚辭氣欠從容遂失溫柔敦厚旨元人之詩學晚唐巧者自巧狂者狂太音元氣日凋喪詩道至此幾云亡又近體論詩云雕肝斲肺漫勞神語不求奇意自新爾雅本無難識字離騷還有獨醒人蓋自道其所得也附錄周青士云威寧詩不雕不琢而符采奕然五言如一杯今夕酒十載異鄉人客裏有歸夢眼前無故

人石橋平似掌茅屋小於船豆蔓穿籬過苔錢上樹
生飛來沙上鷺銜出水中魚夜吟山月小春夢海天
遙七言如四面好山朝日觀一溪流水落天門雲間
雞犬迎游客雨後兒童婦落花一路草香都是藥滿
林樹老盡生苔閒身未老休扶杖短髮無多不受簪
風向眼中吹出淚霜於髯上凍成冰愁人正似井中
坐好客忽從天上來金縷且聽新樂府鐵衣休話舊
軍功亭前春雨一林竹溪上秋風兩岸蘆路隔三千
餘里遠月經二十四迴圓百年人得幾時健一歲月

無今夜明自笑年來長送客不知身是未歸人鵲遺
巢去鳩先入蛛曳絲來蝶倒懸山下夕陽芳草路橋
邊流水落花村當時只學魯男子今日不如阿大夫
莫笑買牛新學稼也曾騎馬舊巡邊不求工而未嘗
不工也

沈肆字公貴平湖人景泰辛未進士山東道御史
有橋門漫橐柏臺新橐

公貴少與兄公禮齊名公禮名琮中正統壬戌進士仕
至廣州守兄弟居父母喪廬墓下六年不肉食先後哀

毀卒詔旌其宅曰孝行之門公禮詩有石窗漫稟予少
日曾見之記有穉穉香生秋雨後桔槔聲斷夕陽前雨
餘竹外僧歸寺日出松顛鶴下巢山花帶雨落成片野
鳥見人飛作羣之句今其集不復再覩矣錄公貴詩附
識於此

李應禎名姓以字行更字貞伯長洲人景泰癸酉
舉人授中書舍人仕至南京太僕寺少卿有李
氏遺集

少卿入太學中官牛玉請爲塾師固拒之在中書日應

制寫佛經進曰臣聞爲天下國家有九經不聞有佛經
也不受命可謂姦直矣歸田後與吳原博史明古張子
靜輩賦詩聯句其寄友詩云別墅園基常載酒晴湖泛
月不張帆風流可想也

徐溥字時用宜興人景泰甲戌賜進士第二累官
少師兼太子太師吏部尙書華蓋殿大學士卒
贈太師諡文靖有謙齋文錄

文靖詩不求工然如鳥跡平沙晚花香小徑春但使客
長醉何妨酒屢賒綽有風致

張寧字靖之海鹽人景泰甲戌進士官禮科給事中兩使朝鮮轉都給事中出知汀州府有方洲集

黃門賦才捷敏不費沉思兩使朝鮮水館星郵畱題殆遍陪臣朴元亨以刑曹判司爲館伴詩篇酬和殊不相下及偕登太平館樓黃門成七言長律六十韻元亨誦至溪流殘白春前雪柳折新黃夜半風之句乃閣筆曰不能屬和矣使旋爲大臣所忌出守汀州與岳文肅同日拜命致仕歸而築方洲草堂於海濱壘石爲山上有

峰曰蒼玉曰拄頰曰小飛來巖曰宿雨曰滴露洞曰歸
雲坡曰蘭雪岫曰茶烟嶠曰咏月磐曰卓筆泉曰洗研
池曰映山皆劉於石而通目之曰一笑山家居三十年
歌詩畫筆與雲東逸史齊稱暮年無子有二婢子曰寒
香晚翠剪髮自誓不下樓者四十年有司以聞詔旌爲
雙節釋明秀詩云交翦雲鬟報主恩鏡臺花落洗頭盆
同心誓死方洲上霜月寥寥夜照門一時和者甚衆黃
門嘗過杭州潑墨寫目送飛鴻手揮五絃圖縱橫潦草
侍婢笑之題詩云閒尋敗筆作圖畫小鬟立侍笑欲倒

山頭頽似土灰堆樹根亂若蓬蒿草所云小鬟殆卽寒香晚翠乎

附錄蔣仲舒云靜之旣離瑣闥旋就乞身追念舊恩愴然興涕歌詩本於才敏終鮮沉思大概一時之雄終難百世之業顧元言云方洲縱調騁情頗稱作者句如林葉經霜盡河冰近午開殷璠所稱意新理愜斯得之矣

邱濬字仲深瓊山人景泰甲戌進士選庶吉士授翰林編修歷侍講學士陞禮部侍郎進尙書加

太子太保人直文淵閣尋加少保戶部尚書武
英殿大學士卒贈太傅諡文莊有瓊臺會彙

文莊於詩不事鍛鍊而矩度自合其與友人論詩絕句
云吐語操持不用奇風行水上繭抽絲眼前景物口頭
語便是詩家絕妙辭其言未嘗不是第恐學者因之流
於率易墜入定山一派不可也

附錄李賓之云公之學於詩固有所不屑專而實專
門者所不逮 程克勤云公詩如仙翁劍客隨口所
出皆足驚人雖雅俗正變體裁不一而格律精嚴不

失矩度

伍方字公矩嘉興人景泰甲戌進士知武岡州謫

戍柳州有柳菴集

公矩與張靖之邱仲深同年成進士三人莫逆時有倡
酬靖之詩云邱仲深伍公矩元是長安看花侶又云江
東雲渭北樹仲深不來公矩去望斷斜陽舊游處仲深
亦有送公矩之柳州詩云平生故人伍公矩少年學文
今學武興來拔劍爲我舞顧儂豈是噲等伍末云吳山
高兮粵水長南歸若見張給事引杯燒燭歌我送行章

可謂篤同譜之義矣柳菴集予少日於金明僧舍見之
凡四冊曾覽一過今購之不復可得僅從樵李英華集
錄其一絕雖不見好存其人可也

杜庠字公序長洲人景泰甲戌進士除知攸縣罷
歸有楚游橐江浙歌風集

公序從張節之游同學者藐之節之贈詩云炳蔚虎豹
文卓犖珊瑚枝學子因改視焉嘗過赤壁題詩張汝弼
奇之一時呼爲杜赤壁仕旣不達汗漫湖海間自稱西
湖醉老莓牆椒壁過輒畱題然不經意其可存者寡也

黃瑜字廷美香山景泰丙子舉人長樂知縣有

雙槐詩集

井嶼宋端宗御舟至此廷美詩云白雁過江南破更無
一尺土可坐自閩入廣隨波流塵沙暗天天亦愁黃蘆
苦竹風颼颼鷓鴣雨中啼不休上有深井山下有仙女
嶼黑雲卷波白浩浩漁舟不到御舟到鱷魚鬣揚蛟尾
掉蒼天蒼天誰與告是詩依南海歐奏孚所藏錄本與
廣東通志所載不同

聶大年字壽卿臨川人用薦爲仁和訓導陞教諭

景泰初徵入翰林卒有冷齋集

聶大年掌教武林揭對聯示諸生云文章高似翰林院
法度嚴於按察司以是見忤達官九年不調泰和王行
儉掌銓衡以詩寄戴文進索畫自敘十年始成大年題
其後云公愛文進之畫十年而不忘也使公以十年不
忘之心待天下之賢天下豈復有遺才哉語稍聞於王
而王不介意也天順初被徵入史局病中以詩別行儉
曰鏡中白髮難饒我湖上青山欲待誰千里故人分橐
少百年公論蓋棺遲行儉得詩泣下曰大年欲吾銘其

墓耳明日而大年卒行儉爲作墓志曰吾以大年之才必能自振故久不擬薦而乃止一校官邪大年諸體平熟惟絕句小詩差有韻致比於劉泰士亨陸昂元偁馬洪浩瀾王澄天碧諸子似勝之

劉溥字原博長洲人宣德初授惠民局副使後調太醫院吏目有草牕集

劉原博湯公讓盛有詩名原博於除夕爲劉主事廷美作終南進士行廷美懸之堂上次日賀正客至爭裂門籍紙傳寫廷美笑曰此乃耗紙鬼也嘗語客云不讀二

萬卷詩看溥詩不得而公讓守宮詩出一時驚歎以爲
有神今觀之殊堪作惡時無英雄遂有十才子之目然
就諸子而論原博特多忠悱之言於彼法中差勝劉宗
器贈詩云心事一於詩激發何慨慷靜中聊自怡鬱抑
賴舒暢短章旣從容長篇亦跌宕府藏出珍奇鈞天奏
空曠正如巨陂中魚龍交蕩漾有時爲我歌三歎而一
唱未免矜譽過其實矣

湯允勳字公讓東甌襄武王曾孫授錦衣百戶轉
千戶景泰中命通問上皇歸進指揮僉事成化

初以參將守延綏戰沒有東谷集

徐元玉言於裕陵曰湯允勳酒風漢耳鄒克明嘲以詩云湯家公子善夸詡好似蚍蜉撼大樹文章光燄萬丈長却說杜陵無好句當時公論蓋未盡輸心也程克勤爲作傳稱其詩豪邁奇崛名家退避豈其然乎然使不辱命死於疆場則誠豪傑之士矣

蘇平字秉衡海寧人舉賢良方正不就有雪溪漁唱

鄭谷鷓鴣崔珣鴛鴦謝逸蝴蝶袁凱白燕皆以一詩目

之終身至蘇秉衡以繡鞵得名風斯下矣卽其南陌踏
青春有跡西廂立月夜無聲二語乃本於瞿宗吉少時
香奩之作所云燕尾點波微有暈鳳頭踏月悄無聲也
以吞剝而得虛譽忸怩已甚而秉衡妄爲大言謂宋一
代今體詩僅王禹玉元夕一律彷彿唐人高青邱詩二
千首近體止吳女誦經一首可取爾當日鄒御史克明
作三夸詩以秉衡爲首其次湯公讓其次劉原博克明
名在十子之列在同調亦不免嘲笑之他可知已

蘇正字秉貞平弟有雲壑集

蘇直字秉忠平弟有蘭畹集

秉衡兄弟三荆同株無分高下

沈愚字通理崑山人自號崆峒生有箕籟吳歛二集

景泰十子才多下中遁理特爲翹楚同輩極其引重劉原博題其集云清如玉樹含秋霜麗如五色雲錦張琅然天外度靈響一曲一奏春風香蘇秉衡贈詩云玉山才子東吳英丰姿皎皎冰壺清胸中磊塊含元精騷壇少年推獨步天仙鬼仙何足數又云多君祇今英妙年

已有新詩滿人口俊逸還凌鮑謝前清新肯落盧王後
王善甫贈詩云玉樹沈郎更瀟灑芙蓉秋水涵冰姿摩
挲石壁寫新句毫端墨汁光淋漓黃進士閏詩云
多情才子惜春華樂府新聲對客誇朱雀橋邊舊游處
東風開遍小桃花誦之可想見其人矣余初見吳歛集
錄其三詩近東口學士示以先世手抄篋籟集私印尙
存增益八首詩諸體皆清穩而絕句尤矯矯軼羣在劉
白之間題畫二首云汀蒲短短柳珍珍二月桃花水滿
潭攜酒抱琴同一醉人生只合住江南山邊臺榭水邊

樓秋月春花足勝游平底畫船如屋裏人生只合住蘇
州通理兄弟四人愚魯質訥魯字誠學以學官弟子入
場屋望見諸生蓬頭赤腳歎曰待士如此士可知矣遂
走出不復與試以文筆自娛嘗作劉過傳西楊見而擊
節曰如此人當以翰苑處之或勸其入都往謁不屑也
訥字文敏中正統壬戌進士仕至福建按察副使卒于
官仲季皆能詩所著集不傳學士誠學之雲孫也與予
同年入翰林述其家世本末如是

鄒亮字克明長洲人用薦授吏部司務遷南京監

察御史有鳴珂漱芳二集

克明受知於周文襄用况守伯律薦授官嘗撰詩宗韻
海未就而卒自稱梅崖亦曰藻菴居士病中自撰志銘
謂修短有數遺墓在長洲縣金鵝鄉志中不及劉湯諸
子姓名非其所矜式也

王淮字柏原慈溪人有大塊橐

柏原淹博號行祕書詩殊淺率

王貞慶字維善一字善甫定遠人駙馬都尉永春
侯寧之子有茗芋集

善甫懷慶公主所出生於侯門而能脫去統綺之習築
別業於聚寶山中闢一軒繞以桂樹因自號金粟主人
能書善飲酒名其詩曰茗芋集羊城陳廷器序之

彭留字鳳儀莆田人天順丁丑進士除刑部主事
歷官都察院右僉都御史巡撫蘇松召入爲大
理寺卿累轉刑部尙書卒贈太子少保諡惠安
有從吾滯橐

彭公以左僉都御史巡視浙江兼理鹽法憐亭戶之苦
繪八圖上進各系以詩雖未盡工然有元次山春陵示

官吏二詩風骨若臨江詞一篇慷慨激烈信足以起頑
儒其云後來姦佞儒巧言自粉飾叩頭乞餘生母乃非
直筆蓋指修實錄者而言攷高皇帝實錄一修於建文
元年五月至三年十二月書成再修於靖難後至永樂
元年六月書成迨九年復修至十六年五月書成文皇
帝實錄修自洪熙元年五月至宣德五年正月書成四
次纂修總裁楊東里一人均與焉卽如書傳會選許觀
景清實預纂修之列今刊本猶書其名而實錄去之則
建文諸臣在洪武中嘉言懿行槩從刪削而顛倒其是

非可知已彭公所指斥殆爲東里言之乎

又云煎鹽之法惟海濱居民晰之書生多未詳也惠安
經進鹽圖諸詩已具其槩然不若施宿會稽志所載靡
有利義今節錄於後云會稽亭戶煎鹽法以海潮沃沙
暴日中日將夕刮鹹聚而苦之明日又沃而暴之如是
五六日乃淋鹹取滷然後試以蓮子每用竹筒一枚長
二寸取老硬石蓮五枚納滷筒中一二蓮浮或俱不浮
則滷薄不堪用謂之退滷蓮子取其浮而直若三蓮浮
則滷將成四五蓮浮則滷成可用謂之足蓮滷或謂之

頭滷然石蓮試以滷取最後升者爲足蓮足蓮乃可驗
滷有無足蓮者必借人已驗蓮滷較蓮之輕重爲之然
後爲審編竹爲槃槃中爲百耳以篾懸之塗以石灰纔
足受滷燃烈燄中滷不漏而槃不焦灼一槃可煎二十
過淋下滷水或以他水雜之但識其舊痕以飯甑蓋之
於中坎去面水至舊處元滷盡在所去者皆它水或以
甑算隔之亦可以他物則不可分矣孔融論云做算不
能救鹽池之滷意蓋指此練化術云飲食過鹹以飯算
竹數條炙之著其中則汁便澹蓋未易以理推也覽此

讀惠安諸詩可以豁然無滯義矣

王佐字廷用天順己卯舉人福州衛籍官訓導以

子鼎貴封都御史有三留橐

廷用宮怨詩云芙蓉帳冷減容光愁倚薰籠嬾著牀寒
氣逼人眠不得鐘聲催月下迴廊是詩載集中侯官曹
能始十二代詩采之游用之夢蕉詩話謂南寧伯毛舜
臣畱守南都灑掃舊內見別院牆壁多舊宮人題詠年
久剝落不可辨識其一署曰媚蘭仙子書卽此詩末二
句也當出好事者傳會不然裕陵定都北京之後康陵

未南巡以前安有宮人以廷用詩書之南內壁乎

鄭紀字廷綱仙游人天順庚辰進士累官南京戶

部尚書有東園集

尚書無詩名然如古塹斜連江樹沒飢鳥低傍野人飛
橋頭雨歇溪初溜天際雲收山漸多亦自琅然可誦

陸欽字鼎儀崑山人天順甲申賜進士第二授翰
林編修遷修撰陞太常少卿翰林侍讀時與張
泰陸容稱崑山三鳳有春雨堂橐

鼎儀與西涯同登第西涯時年十七鼎儀瓊林醉歸詩

所云行過玉河三百騎少年爭說李東陽是也西涯好
推挽人才求詩者至填塞戶限乃賦詩以止作詩鼎儀
聞之失笑戲作八止詩貽之西涯申雞酒之約未踐也
會謝鳴治陳師召促西涯題詠西涯遂渝止詩之約偕
謝陳兩公載酒鼎儀邸舍李明仲羅亨父亦至卽席分
韻詩成書之卷軸鼎儀又嘗與陸文量飲朱懋孳亦有
教坊弟子王秀侑觴夜深風冽琵琶絃屢斷主人以洞
簫繼之秀舍絃按拍清歌數曲歌詞有學士波字蓋方
言也鼎儀爲賦詩紀其事有醒後空慙學士波之句當

月請公逢太平盛際翰苑風流經過輒成勝引予嘗過
北平孫侍郎讌室獲觀西涯陵祀歸和鳴治騎字韻詩
和者數十人裝成行看子足稱玉堂嘉話也鼎儀郎在
新堤今已不知其處

詩話卷七

七

扶菴山房

詩話卷七